

中國名人傳記叢編

次海出版社
有限公司印行

碑傳集補

碑

傳

卷十九至卷二十三 監司・守令

江苏工业学院图书馆
集藏 书 章

補

閔爾昌錄

文海出版社

有限公司印行

碑傳集補卷十九

江都閔爾昌纂錄

監司三

河南布政使孫公墓表

孫葆出

穆宗毅皇帝御極之初大學士倭文端公方以理學爲天下倡一時出其門者類多潔修自好之士其後或以直言極諫負當時重望或以功名顯而不獲終展其長者亦甚眾如吾鄉游侍郎孫布政皆其人也孫公諱鳳翔字文起一字梧岡其先由直隸棗強縣遷山東世爲濰縣人祖諱仲采父諱炤皆以公貴贈光祿大夫妣皆贈一品夫人公由郡學廩生中咸豐八年舉人同治元年成進士改庶吉士散館授檢討試御史充順天庚午鄉試同考官補江南道監察御史歷充鄉會試監試官署陝西

道監察御史疏參內務府大臣貴寶與革員李光昭交通舞弊
合肥李公見其疏曰是不媿眞御史矣會奉天府丞張公奏請
定鄉試應試人數順天學政錢公奏請科試隨棚錄遺均經禮
部議允矣公抗疏爭之其畧謂我朝列聖相承士子涵濡教澤
二百餘年文風日上比年特開恩榜并諭令借棚攷試所以扶
植士氣維繫人心者至深且遠應請照舊章辦理爲宜得旨俞
允疏出土林誦之光緒元年冬簡放江西知府召見時諭以兵
燹後小民困苦知府爲州縣表率務宜多方撫恤以培元氣明
年補廣信蒞任後恪遵聖訓興利除弊次第舉行是時兩江總
督爲沈文肅公卽前守廣信以守城功赫然有名稱者也廣信
人謂公政績堪與沈公後先媲美而文肅公亦以士愛民懷薦
其賢彭剛直公巡水師至江西采輿論稱公爲清廉第一六年

升廣東督糧道時張靖達公樹聲爲總督奏請洋務專歸道員辦理公以剛正不阿爲洋人所敬憚事多遷延不肯就公議明年遂改調惠嘉潮道會德領事欲侵汕頭地爲商埠公復與力爭事遂寢不果行至今汕頭地不隸於外洋者公之力也又明年調補雷瓊道未赴是歲八月簡授安徽按察使入覲蒙溫諭嘉獎抵任未逾月兩江總督左文襄公奏調赴江寧訊駱賢基獄是獄經數年未決公推鞠一晝夜遂成信讞文襄公大悅以爲明決無倫也旋拜河南布政使之命未數月又奉命署漕運總督任事兩月將返豫又奉旨馳赴上海查辦事件公據實覆奏并附陳援閩兵輪有二艘不可用請飭南洋大臣慎益加慎毋損軍實其後二艘果以竄遲至沈人始服公先見之明公旣回任旋奉命護理河南巡撫前後巡撫使爲鹿公傳霖邊公寶

泉皆公同年友又皆嘗受學於倭文編公故吏治號爲清明然
鹿公治事精嚴公則濟之以寬大而自受撫篆後憂勞過兩
目漸生翳障及邊公接撫篆公遂以目眚請告奉旨賞假兩月
毋庸開缺蓋異數也會部敍歷年籌餉勞賞加頭品頂戴公益
感激圖報乃假滿疾仍未痊復申前請遂解任回籍以明年四
月某日薨於里第娶于夫人子四符簾範箴符議敍鹽場大使
簾議敍按察使經歷範箴皆候選教職孫十一人曾孫幾人公
之薨也吾友柯編修實爲行狀以備史官之采擇獨取公奏疏
有關時政者詳著于篇予爲掇其大要因竊歎近日新政之多
紛更惜無人爭言如公其人者始公與游公同爲御史俱以言
事知名游公由臬司內召官倉場侍郎卒以微過去官公雖官
終方伯而歷權督撫行將大用蓋朝廷之知公深矣而不幸未

竟其施此尤可爲慨惜者也公子符等嘗問公所得於倭文端者爲何曰吾師一生惟守母自欺三字其教人亦如是嗟乎此可以知其淵源所漸矣

袁保齡傳

章授

袁保齡甲三次子同治元年舉人兄保恆自有傳咸豐閒甲三視師淮上保恆暨其從兄保慶皆從征役保齡奉祖母郭母陳里居尋甲三積勞成疾保齡太息流涕曰吾父力疾督軍諸兄頻年戎馬吾不能執干戈衛社稷非丈夫也所不忍離者重慈奉養耳祖母及母嘉其志命之軍時兵餉奇窘躬歷各營拊循眾志固結雖飢困中皆能踴躍用命二年蒙城餉竭苗沛霖踞懷蒙窺陳宋甲三已乞病歸復被命督辦團防保齡周歷各團撫其反側各圩曉以利害使苗逆不得合從內犯張總愚率大

股再犯陳州復會合兵團分籌堵禦危城獨完羣捻紛竄孤其
黨羽官兵乘之皖豫肅清甲三以己子不列奏報曾國藩一見
目爲國士尋甲三卒蒙恩賞內閣中書五年補缺十年記名內
用十一年恭校剿平粵匪方略剿平捻匪方略告成保侍讀遇
缺奏補光緒三年恭纂穆宗毅皇帝實錄全書過半賞花翎並
換四品頂戴恭纂玉牒告成奏獎俟補侍讀缺後以知府在任
卽選並交部議敘四年以兄保恆奉命籌辦豫賑盡瘁以卒因
念直晉陝豫游譏不速拯流亡伏莽一煽蔓延大局匪第爲桑
梓患時方補侍讀慨然以兄志未竟豫民未活呈請開缺歸里
辦賑盡出家財益以稱貸遠近聞風傾助大河南北全活無算
舉凡賑災善後興水利置農具靖奸宄無不力陳撫臣次第施
行豫撫徐宗瀛以捐助豫賑不敢邀獎奏聞稱保齡念累朝蒙

養之恩遵父兄勇於爲善之教倡率鄉人勉圖博濟毀家紓難
出於至誠詔敕部照各省賑例給獎遂以道員不論雙單月卽
選加三品銜五年實錄全書慶成賞二品頂戴保齡歷官內閣
中書侍讀十有三年於天下要聞博考遠覽熟悉掌故七年直
隸總督李鴻章以其曩侍甲三軍中襄事諳習戎機博通經濟
才具勤敏疏調辦理北洋海防營務諸差時淮練各軍集於津
沽保齡勤力蒐討遇有民兵交訟之案率右民抑兵以保良懦
八年朝鮮亂黨內訌毀日本使館日兵輪駛仁川口日使臣以
兵入漢城保齡奉檄援護慶軍統領吳長慶方率六營東渡保
齡建議韓王孱弱宜大舉戡亂選得力軍數道並出清理案犯
更訂條約遣忠正廉誠胸有今古者統勁旅長駐彼都扶起孱
王實行監察效衛文治衛力策富強與遼東三省左提右挈實

東方一大屏障若敷衍了局韓其不旰食矣力請調宋慶所統毅軍爲後盾吳宋皆甲三舊部曾同袍澤願以軍旅自任直隸總督韙其言曰人知我有備遽與韓議和時我國方擴張海軍當事謂宜持重議遂中寢韓亂既定直隸總督疏請以道員留直隸補用乃益銳請整頓軍實是年冬赴奉天旅順口督海防工兼辦水陸軍防務先是奉檄履勘沿海通籌形勢無以易旅順者跨金州半島突出大洋水深不凍山列屏障口門五十餘丈口內兩澳四山圍拱形勝天然誠海軍之奧區也於此濬淺灘展口門創建船塢分築礮臺廣造庫廠設外防於大連灣屯堅壘於南關嶺與威海各島遙爲聲援遠馭朝鮮近蔽遼瀋實足握東亞海權匪第北洋要塞也至是規畫建築九年李鴻章奏飭駐工督率稱北洋防務以旅順最爲繁鉅西國遇此天險

可爲水師窟穴必以全力注之北洋歲收經費有限祇可就現有財力逐段竭蹶經營開山濬海工大費鉅購料運器於西洋派員雇夫於直省與內地工程迥異初旅順於七年閒試辦築壩濬澳久無成功灘地沮洳海潮怒撼百計不足捍禦保齡受任迭與提督宋慶丁汝昌臬司周馥道員劉含芳等察勘妥籌次第興作其築攔潮壩一役於冰雪風霧中督工役植立壩上四十日仿栗毓美石壩純用塊石護之始獲堅穩時荒島初闢海聲硠硠內地賓僚率相視裹足保齡晝督洋匠土夫工作夜則篝鐙草文書恆以一身兼數任其勞苦非常人所能耐法越構衅法人聲言北犯旅順口僅成黃金山礮臺一座保齡跋山涉海測地鳩工不數月而東西兩岸七臺成又設備戰土臺無數分置克虜卜大礮添置防營環營數十丈植梅花椿阱沿岸

伏旱雷海口伏水雷以防敵兵暗襲其時津沽旅順陸路二千里未設電綫急請興建聯絡防軍節節布置聲勢俱壯法艦遂未敢北窺其規畫旅防戰守也則以嚴防後路爲要義任守者自西南之饅頭山訖東南之嶗嶸嘴分段布置敵船逼近洋面環攻各臺則守臺者當之任戰者專顧後路與礮力不能及之零星口岸大隊游擊隨宜策應倘各臺堅守而寇來襲我則任戰者當之其通籌金州旅順大局也則以客軍久戍非長策添練土兵爲要義以遼人守遼土以遼土養遼人嘗就海口隙地種桑柘教民紡織設學堂導民忠義屢陳當道思起長白寶廷駐金州部勒金復五城旂兵寬籌教養而以宋慶專司簡練以開遼民敢戰之風聯奉直之疆防合兵民爲一體尤於議懲庸將不稍貸請申軍律如臨陣潰逃或畏葸不前宜照前明傳首

九邊例於正法後傳示南北洋以昭炯戒十年夏李鴻章會同吳大澂張之洞等出洋巡閱以旅順新築礮臺營壘堅緻曲折頗據形勝操演水雷旱雷均漸熟習設海上有事牽制敵船冀可憑險固守合疏奏聞稱保齡督飭之力會朝議立海防衙門大治水師李鴻章飭保齡密議乃建六策一曰重事權謂宜設海防大臣一人凡七省防軍制兵在海口二百里者司道都統提督以下歸節制黜陟用舍均以海防大臣爲衡關道任兼海防宜照糧道屬漕督例以海防大臣爲專轄一曰定經制由部頒關防制同六部設參贊一視四五品卿大臣駐北洋參贊駐南洋或暫置翼長二員一駐渤海一駐南洋別設南洋水師統領一凡歲時查閱防營得失師船勤惰制器良楮皆爲參贊若翼長職之又設四司曰軍政曰船政曰度支曰考藝每司設官

由中外大臣邊薦一曰建軍府應以旅順爲建牙爲師船歸宿以威海備巡閱一曰簡船械宜將機器製造統一整頓中分兩大端曰製造宜分寄責任槍礮宜規定畫一一曰籌用費減額兵汰江海舊防一曰儲人才宜設水師小學大學練船別設科目優予出身洋洋萬餘言而終之以無競維人且謂人才不出縱使船堅礮利其孰與奏折衝之效慨乎言之逮甲午之役日人逆慮攻旅順不能破適銘豫各軍分顧遼瀋後路空虛遂得乘虛襲擊坐失天塹論者惜之是年十一月韓亂黨附日本者乘沽口封凍駐韓防軍皆屬北洋電綫未通意欲斷其接應謀爲不軌韓逆首金玉均等戕害大臣迫脅國王僞請日兵入衛舉國震動保齡從子世凱駐兵朝鮮迎護韓王馳報保齡急電北洋由旅順分籌接應立集水陸軍轟冰渡洋駐馬山口以厚

兵力密稟力陳法氛圖南警報方惡宜款法以紓兵力調南北
洋各艦合力救韓規定久計赦李是應以堅韓民內嚮韓刑政
失當中國力盡保藩之義須越俎代謀若虛與委蛇終爲越續
語極切摯李鴻章據以入告朝命吳大澂續昌馳往查辦亂黨
由北洋設備接濟日使井上馨後我軍三日始至懾於聲勢復
與韓定約實保齡在旅順籌濟策應之力日本鑒於壬午甲申
中國防軍兩次赴機迅速詭議互相撤兵遂有天津之約朝鮮
君臣亦堅請赦是應旋即釋歸而外侮內患逆黨紛持無兵力
以鎮之卒未能悉如保齡初議保齡以韓勢日危乃請於邊門
鳳凰置重防西連旅順東接琿春舉張曜督治之遙顧朝鮮庶
金旅防軍首尾相應請添漢城至邊門電綫通軍報資控制李
鴻章皆用其策陳奏施行尋李鴻章奏派保齡從子世凱駐朝

鮮總理交涉通商事務因言自古交鄰視乎強弱兵事與使事相維持未可專恃筆舌日俄爭先圖韓英德實陰忌之宜聯與國以拒敵厚邊備以圖戰北洋兵輪時巡仁川大同各口弭患無形韓王被閔妃黨蠱惑媚外甚力非速清君側實行改革莫挽危局李鴻章以爲然卒以牽於時勢未行也十二年醇親王親閱旅順深以海防布置合宜袁保齡尤爲得力奏聞下部優敘十五年七月病卒於旅順防次李鴻章奏陳其經營旅防保護朝鮮以死勤事請照軍營積勞病故例優卹詔從之賜祭葬贈內閣學士蔭一子如例保齡自弱冠從戎心存君國及官中書師事倭仁李棠階研究性理之學時洋務爲人詬病保齡慨言時局至今日竟若洋務必不須正人正人必不解洋務事無大小未有舍君子用小人而能濟者安得擇純儒志士勉以共

勵洋務論處外人以忠信篤敬爲主論練洋操以有勇知方爲主又嘗引曾國藩救世變者莫大乎忠誠一語以自勗故其壯歲所成就已如此而卒年僅四十有九李鴻章奏請卹典疏亦深爲朝廷惜之宣統三年河南京官吏部右丞孫紹陽等以保齡勲勤卓著遺愛在人略謂光緒閒豫省奇荒禦災捍患厥功尤偉呈請將其生平事蹟宣付史館附列袁甲三傳後得旨俞允子世承蔭生山東候補直隸州知州世顯江蘇候補同知世敷附貢生分省通判世同廩貢生湖北候補知府世傳附貢生二品頂戴候補四品京堂世威候補布政司經歷

贈內閣學士銜署永定河道金公墓誌銘

袁昶

維光緒十八年夏故觀察金公卒於里第越若季冬六日葬於嘉興之楊墩烏乎惟公勲勲亭毒毗庶未竟其用而大河以北